

AMOR TA DJUDA

NA FAZE DISIPLUS





AMOR TA DJUDA

NA FAZE DISIPLUS

Nómi _____

Kongregason _____

Dónus di fotus: Pájina 28: NASA, ESA and the Hubble Heritage Team (STScI/AURA)-ESA/Hubble Collaboration. Licensed under CC BY 4.0 (<http://creativecommons.org/licenses/by/4.0/>). Source: <https://esahubble.org/images/heic0702a/>; pájina 29: Based on NASA/Visible Earth imagery

Es lívru é ka pa bende. El fazedu pa uza na un prugrama pa inxina Biblia na mundu interu, ki é sustentadu ku kontribuisons dadu di livri vontadi.

Si bu krê faze un kontribuison, favor bai na donate.jw.org.

Si ka dadu otu indikason, tudu testu é traduzidu di *Traduson di Mundu Novu*.

Love People— Make Disciples
Idison di maiu di 2023

Kabuverdianu (*Imd*-KBV)

© 2023
Watch Tower Bible and Tract Society of Pennsylvania

Iditoris
Associação das Testemunhas de Jeová
Rua Conde Barão, 511, Alcabideche, Portugal
Associação das Testemunhas de Jeová
Rua Patote, N.º 12, Fazenda, Praia, República de Cabo Verde

Karta di Grupu Enkaregadu di Óbra

Nos irmons i irmans ki nu krê txeu:

Amor pa Deus i pa pesoas ta motiva-nu pa nu obi ku kel órdi ki Jizus da: “Nhos bai i nhos inxina algen di tudu nason pa es bira nhas disiplu. Nhos batiza-s”. (Mat. 28:19, 20; Mar. 12:28-31) Amor di verdadi ten txeu puder. Si nu ten kel tipu di amor li pa pesoas, nu ta pode djuda kes ki ten “bon atitudi pa ganha vida pa tudu ténpu”. — Atus 13:48.

Antis, nu ta konsentraba na dikora aprizentasons i na dexe pesoas ku publikasons. Má gósi nu meste sforsa pa midjora nos kapasidadi di pâpia ku otus algen. Nu krê mostra pesoas amor i nu ta faze kel-li óras ki nu ta pâpia ku es sobri kes asuntu ki ta *interesa-s*. Kel-li krê fla ma nu meste ser ikilibradu i pensa dretu na kuzê ki ta preokupa i interesa kada algen. Modi ki es bruxura ta ben djuda-nu faze kel-li?

Es bruxura ten 12 lison ki ta inxina-nu kualidadis ki nu meste dizenvolve pa nu mostra amor i faze disiplu. Kada lison ten bazi na un stória di Bíblia ki ta inxina-nu sobri un kualidadi ki Jizus ô kes primeru kriston na ténpu di apóstlus mostra na pregason. Obijetivu é djobe maneras di mostra amor pa pesoas envê di dikora aprizentasons. Enbóra kada kualidadi é inportanti na tudu ária di nos trabadju di pregason, nu ta ben odja modi ki alguns kualidadi é txeu inportanti óras ki nu ta kumesa ta pâpia ku pesoas, faze revizitas ô faze studus di Bíblia.

Óras ki bu ta analiza kada lison, pensa ku kuidadu sobri modi ki bu pode mostra kada un di kes kualidadi óras ki bu ta pâpia ku pesoas na undi ki bu ta mora. Sforsa pa bira bu amor pa Jeová i pa pesoas más fórti. Kel amor li, é más inportanti di ki kalker kapasidadi i el ta ben djuda-u alkansa bu méta di faze disiplu.

Nu ta da txeu valor pa priviléjiu di trabadja djuntu ku bo. (Sof. 3:9) Pa Jeová kontinua ta abênsua nhos txeu, timenti nhos ta kontinua ta mostra amor pa pesoas i ta faze disiplu!

Nhos irmons,

Grupu Enkaregadu di Óbra di Tistimunhas di Jeová

Lista di asuntus

PÁRTI 1: KUMESA TA PÂPIA KU PESOAS

LISON

Pâpia di kuzas ki ta interesa otus algen	1
Pâpia sima na un konbêrsu normal	2
Mostra bondadi	3
Ser umildi	4
Pâpia ku ruspetu	5
Ka bu xinti medu di pâpia	6

PÁRTI 2: FAZE REVIZITAS

LISON

Kontinua ta tenta djuda pesoas	7
Ten paxénxa	8
Poi na lugar di otus algen	9

PÁRTI 3: FAZE DISIPLUS

LISON

Sforsa pa djuda pesoas bira disiplus	10
Inxina di un manera sinplis	11
Mostra koraji	12

APÉNDISI

Verdadis di Bíblia ki nu gusta di inxina	1
Bu debe para kel konbêrsu?	2
Modi ki nu pode uza <i>Vive filís pa tudu ténpu!</i> pa faze studus di Bíblia	3

1

Juan 4:6-9



Pâpia di kuzas ki ta interesa otus algen

Konsedju di Bíblia: “Amor... ka ta djobe se própi interesí”. — 1 Kor. 13:4, 5.

Kuzê ki Jizus faze

1. Odja **VÍDIU**, ô lé **Juan 4:6-9**. Dipôs pensa i responde kes pergunta li:
 - a. Kuzê ki Jizus repara sobri kel mudjer antis di el kumesa ta pâpia ku el?
 - b. Jizus fla: “Da-m un bokadinhu di agu.” Pamodi ki kel-li foi un bon manera di kumesa un konbêrsu?

Kuzê ki nu ta prende ku Jizus?

2. Si nu kumesa ta pâpia ku un algen sobri un asunto ki ta interesa-l, nu ta ten más xansi di ten un bon konbêrsu ku el.



VÍDIU: Jizus ta pâpia ku un mudjer na un posu

Imita Jizus

3. **Ser ikilibradu.** Ka bu insisti na kumesa ta pâpia ku un algen sobri un asuntu ki dja **bu** priparaba. Kumesa ta pâpia sobri algun asuntu ki **pesoas** sta ta pensa na el oji. Pergunta bu kabésa:

- a. ‘Kuzê ki pesoas sta obi na notísias?’
- b. ‘Sobri kuzê ki nhas vizinhu, kolégas di trabadju ô di skóla sta ta pâpia?’

4. **Presta atenson.** Pergunta bu kabésa:

- a. ‘Kuzê ki kel algen sta ta faze? Kuzê ki el pode sta ta pensa na el gósi?’
- b. ‘Kuzê ki ropa di kel algen, se aparénsia ô se kaza ta mostra-m sobri se kultura ô kuzê ki el ta kridita na el?’
- c. ‘Kel-li é un bon óra pa N pâpia ku kel algen?’

5. **Obi.**

- a. Ka bu pâpia txeu.
- b. Insentiva kel algen pa pâpia.
Sénpri ki ta da, faze perguntas.

ODJA TANBÊ

Mat. 7:12; 1 Kor. 9:20-23; Fil. 2:4; Tia. 1:19

2


Atus 8:30, 31



Pâpia sima na un konbêrsu normal

Konsedju di Bíblia: 'Un palavra déntu d'óra é bon dimás!' — Pro. 15:23.

Kuzê ki Filipi faze



VÍDIU: *Filipi prega pa kel eunuku di Itiôpia*

1. Odja **VÍDIU**, ô lé **Atus 8:30, 31**. Dipôs pensa i responde kes pergunta li:
 - a. Modi ki Filipi kumesa ta pâpia ku kel eunuku di Itiôpia?
 - b. Pamodi ki kel-li foi un manera normal di kumesa ta pâpia ku kel ômi i inxina-l un kuza novu?

Kuzê ki nu ta prende ku Filipi?

2. Si nu pâpia ku un algen di manera normal, el pode xinti más avontádi i krê obi kuzê ki nu sta fla-l.

Imita Filipi

3. **Presta atenson.** Bu pode prende txeu sobri un algen si bu presta atenson na se róstu, na se manera di sta i na jéstud ki el ta faze. Kel algen sta mostra ma el krê pâpia ku bo? Bu pode kumesa ta pâpia sobri un verdadi di Bíblia ku un pergunta sinplis sima: “Bu sabia ma... ?” Ka bu insisti na pâpia ku un algen si el ka krê pâpia ku bo.

4. **Ten paxénxa.** Ka bu atxa ma bu ten ki kumesa lôgu ta pâpia sobri un asuntu di Bíblia ku kel algen. Spera óra sértu pa bu faze kel-li di manera normal. Alvês pode ser ki bu ten ki spera ti ki bu pâpia ku kel algen otu bês.


5. **Faze mudansas.** Kel algen pode kumesa ta pâpia sobri un kuza ki bu ka sta ta speraba. Nton, pa bu pâpia sobri un asuntu ki ta **interesa kel algen**, bu ten ki skodje un otu asuntu di Bíblia diferenti di kel ki bu priparaba.

ODJA TANBÊ

Ecl. 3:1, 7; 1 Kor. 9:22; 2 Kor. 2:17; Kol. 4:6

3

Juan 9:1-7



Mostra bondadi

Konsedju di Bíblia: “Amor... é bon”.

— 1 Kor. 13:4.

Kuzê ki Jizus faze

1. Odja **VÍDIU**, ô **lé Juan 9:1-7**. Dipôs pensa i responde kes pergunta li:
 - a. Kuzê ki Jizus faze primeru? El kura kel ômi ségu ô el pâpia ku el sobri notísias sábi? — Odja Juan 9:35-38.
 - b. Pamodi ki bu ta atxa ma kel ômi staba prontu pa obi Jizus?

Kuzê ki nu ta prende ku Jizus?

2. É más fásil un algen obi nos mensajen si el xinti ma nu ta inporta ku el.



VÍDIU: Jizus kura
un ômi ségu

Imita Jizus

3. **Poi na lugar di kel algen.** Tenta imajina modi ki el sta ta xinti.
 - a. Pergunta bu kabésa: ‘Ku kuzê ki el debe sta preokupadu? Kuzê ki el pode atxa ma ta djuda-l i ta interesa-l?’ Faze kes pergunta li ta djuda-u mostra bondadi di un manera natural i di verdadi.
 - b. Obi kel algen ku atenson pa bu mostra ma bu ta inporta ku kuzê ki é inportanti pa el. Si un algen fla-u modi ki el sta ta xinti sobri algun kuza ô el konta-u un probléma ki el sta ta pasa pa el, ka bu muda di asuntu.
4. **Pâpia ku bondadi i ku ruspetu.** Óras ki bu ta xinti konpaxon pa un algen i bu krê djuda-l di verdadi, kel-li ta fika klaru na manera ki bu ta pâpia. Toma kuidadu ku kuzê ki bu ta fla i modi ki bu ta fla-l. Tanbê ivita fla kuzas ki pode ofende kel algen.
5. **Sta prontu pa djuda.** Djobe oportunidadi pa bu da kel algen ajuda na algun kuza ki el meste. Óras ki nu ta mostra bondadi é más fásil kel algen pâpia ku nos.

ODJA TANBÊ

Rom. 12:15, 16; Gál. 6:10; Eb. 13:16

4

Atus 26:2, 3



Ser umildi

Konsedju di Bíblia: “Nhos ser umildi i nhos pensa ma otus algen é más midjór di ki nhos.” — Fil. 2:3.

Kuzê ki Paulu faze

1. Odja **VÍDIU**, ô lé **Atus 26:2, 3**. Dipôs pensa i responde kes pergunta li:
 - a. Modi ki Paulu mostra umildadi na manera ki el pâpia ku rei Agripa?
 - b. Modi ki Paulu txoma atenson pa Jeová i pa Skrituras envêš di txoma atenson pa se kabêsa? — Odja Atus 26:22.



VÍDIU: Paulu prega pa rei Agripa

Kuzê ki nu ta prende ku Paulu?

2. Nu ta bira nos mensajen más bunitu óras ki nu ta pâpia ku umildadi i ku ruspetu.

Imita Paulu

3. **Pâpia ku ruspetu.** Ka bu mostra ma bu sabe tudu kuza i ma kel algen ka sabe nada.

4. **Mostra klaru ma kuzê ki bu sta ta inxina sta na Bíblia.** Kuzê ki sta na Palavra di Deus pode toka korason di pesoas. Óras ki nu ta uza Bíblia, nu ta djuda pesoas dizenvolve fé na Palavra di Deus.

5. **Kontinua kalmu.** Ka bu insisti na prova ma é bo ki sta sértu. Nu ka krê diskuti. Mostra umildadi, mante kalmu i sabe ki óra ki bu debe sai di la. (Pro. 17:14; Titu 3:2) Si bu pâpia di manera kalmu talvês kel algen ta obi nos mensajen na un otu dia.

ODJA TANBÊ

Rom. 12:16-18; 1 Kor. 8:1; 2 Kor. 3:5

5

Atus 17:22, 23



Pâpia ku ruspetu

Konsedju di Bíblia: “Pa nhos palavra ser sênpri sábi”.
— Kol. 4:6.

Kuzê ki Paulu faze



VÍDIU: *Paulu prega pa
kes algen di Atenas*

1. Odja **VÍDIU**, ô lé **Atus 17:22, 23**. Dipôs pensa i responde kes pergunta li:

- Modi ki Paulu xinti kantu el odja kes kuza di relijion falsu na Atenas? — Odja Atus 17:16.
- Envê di kritika kes algen di Atenas, modi ki ku ruspetu Paulu uza ses krênsas pa pâpia ku es di notísias sábi?

Kuzê ki nu ta prende ku Paulu?

2. Ten más xansi di pesoas obi-nu si nu skodje ku kuidadu kuzê ki nu ta fla, modi ki nu ta fla i na ki óra ki nu ta fla.

Imita Paulu

3. **Skodje bus palavra ku kuidadu.** Pur izénplu, óras ki bu ta pâpia ku un algen ki ka konxe Bíblia i nen kes relijion kriston, talvês bu meste muda bu manera di kumesa ta pâpia di Bíblia ô di Jizus.

4. **Ka bu koriji kel algen lôgu.** Dexa-l pâpia avontádi. Si el fla al-
gun kuza ki ka sta di akordu ku Bíblia, ka bu tenta koriji-l lôgu.
(Tia. 1:19) Óras ki bu ta obi-l, bu ta konsigi intende na kuzê ki el
ta kridita i pamodi ki el ta kridita na kel-la. — Pro. 20:5.

5. **Sénpri ki ta da konkorda ku kel algen i ilojia-l.**

El pode kridita di korason ma kel ki se relijion ta inxina é verdadi.
Pur isu, tenta pâpia di algun asuntu ki nhos dôs ta konkorda ku el
i dipôs djuda-l intende poku-poku kuzê ki Bíblia ta inxina.

ODJA TANBÊ

Pro. 25:15; 2 Tim. 2:23-26; 1 Ped. 3:15

6

Luk. 19:1-7



Ka bu xinti medu di pâpia

Konsedju di Bîblia: “Nu ganha koraji ku ajuda di nos Deus, pa nu pâpia ku nhos sobri kes notísia sábi”.
— 1 Tes. 2:2.

Kuzê ki Jizus faze

1. Odja **VÍDIU**, ô lé **Lukas 19:1-7**. Dipôs pensa i responde kes pergunta li:

- Pamodi ki alguns algen talvês staba ta ivita Zakeu?
- Pamodi ki simé Jizus pâpia ku el sobri notísias sábi?

Kuzê ki nu ta prende ku Jizus?

2. Nu meste ten koraji pa prega mensajen di Reinu pa tudu algen.



VÍDIU: Jizus prega
pa Zakeu

Imita Jizus

3. **Kunfia na Jeová.** Spritu di Deus da Jizus forsa ki el mesteba pa prega, i el pode djuda-u tanbê. (Mat. 10:19, 20; Luk. 4:18) Pidi Jeová pa da-u koraji pa bu prega pa kes algen ki bu pode xinti medu di es. — Atus 4:29.

4. **Ka bu julga otus algen.** Nu pode ka krê pâpia ku un algen pamodi se aparénsia, se puzison na sosiadadi ô dinheru ki el ten, ô pamodi se krênsas i manera ki el ta leba se vida. Má lenbra di kel-li:

- a. Jeová ku Jizus pode odja korason, má nos, nu ka ta konsigi.
- b. Jeová ten puder di djuda kalker algen, ka ta inporta se situason.

5. **Mostra koraji má ku ruspetu i ku kuidadu.** (Mat. 10:16) Ivita diskuti. Si bu odja ma un algen ka krê obi notísias sábi ô si bu ka sta xinti suguru, tirmina kel konbêrsu di manera idukadu. — Pro. 17:14.

ODJA TANBÊ

Atus 4:31; Efê. 6:19, 20; 2 Tím. 1:7

7

Atus 19:8-10



Kontinua ta tenta djuda pesoas

Konsedju di Bíblia: “Es continua sen para ta inxina i ta pâpia di notísias sábi”. — Atus 5:42.

Kuzê ki Paulu faze



VÍDIU: *Paulu continua ta prega na Éfezu sikrê ku difikuldadis*

1. Odja **VÍDIU**, ô lé **Atus 19:8-10**. Dipôs pensa i responde kes pergunta li:

- Envê di dizisti kantu alguns algen fika kóntra el, modi ki Paulu continua ta djuda kes algen ki mostra interesi?
- Kantu bês ki Paulu volta pa inxina kes algen ki mostra interesi i pa kantu ténpu ki el faze kel-la?

Kuzê ki nu ta prende ku Paulu?

2. Nu meste gasta ténpu i sfora pa faze bons revizita i kumesa studus di Bíblia.

Imita Paulu

3. **Sforsa pa faze revizita na un óra ki é midjór pa kel algen.**

Pergunta bu kabésa: ‘Ki óra i na ki lugar ta fika más midjór pa N vizita-l? Ki óra ki el ta ten ténpu pa el pâpia ku mi?’ Sforsa pa faze kel revizita sikrê na un óra ki ka é midjór pa bo.

4. **Pergunta kel algen ki dia bu pode torna volta.** Tudú bês ki bu tirmina di pâpia ku kel algen, tenta konfirma ku el un óra sértu pa nhos pâpia otu bês. Sforsa pa bu inkontra ku el na lugar i na óra ki nhos kombina.


5. **Kontinua ku speransa.** Ka bu pensa ma kel algen ka sta interesadu sô pamodi é difísil atxa-l na kaza ô pamodi el é txeu okupadu. (1 Kor. 13:4, 7) Kontinua ta djobe kel algen, má tanbê sforsa pa uza bu ténpu ku sabedoria. — 1 Kor. 9:26.

ODJA TANBÊ

Atus 10:42; 1 Kor. 9:22, 23; 2 Kor. 4:1; Gál. 6:9

8

Juan 7:3-5
1 Kor. 15:3, 4, 7



Ten paxénxa

Konsedju di Bíblia: “Amor ten paxénxa”.
— 1 Kor. 13:4.

Kuzê ki Jizus faze



VÍDIU: Jizus djuda
se irmon ku paxénxa

1. Odja **VÍDIU**, ô lé **Juan 7:3-5** i **1 Koríntius 15:3, 4, 7**. Dipôs pensa i responde kes pergunta li:

- Na komésu modi ki irmons di Jizus reaji kantu es obi se mensajen?
- Kuzê ki ta mostra ma Jizus ka dizisti di se irmon Tiagu?

Kuzê ki nu ta prende ku Jizus?

2. Nu meste ten paxénxa pamodi alguns algen ta leba más ténpu pa seta notísias sábi di ki otus.

Imita Jizus

3. **Tenta prega di un manera differenti.** Si kel algen ka seta lógu un studu di Bíblia, ka bu forsa-l. Lógu ki da, uza vídius ô publika-sons pa djuda-l intende kuzê ki é un studu di Bíblia i modi ki un studu di Bíblia pode djuda-l.

4. **Ka bu konpara.** Ka ten ningen ki é igual ku kunpanheru. Si un algen di bu família ô un revizita inda ka krê studa Bíblia ô ka seta un kuza ki Bíblia ta inxina, tenta intende pamodi ki kel-li sta ta kontise. Ten algun krênsa di se relijion ki é txeu inportanti pa el? Ten algun algen di se família ô algun vizinhu ki sta ta faze-l pre-son? Da-l ténpu pa el pensa sobri kuzê ki bu fla-l i pa el odja valor ki Bíblia ten.

5. **Ora pa kel algen ki mostra interesi.** Pidi Jeová pa djuda-u kontinua ku speransa i ta pâpia ku ruspetu. Pidi Jeová pa djuda-u sabe óras ki un algen ka tene interesi i si bu debe para di vizita-l. — 1 Kor. 9:26.

ODJA TANBÊ

Mar. 4:26-28; 1 Kor. 3:5-9; 2 Ped. 3:9

9

Mar. 6:30-34



Poi na lugar di otus algen

Konsedju di Bíblia: “Nhos fika kontenti ku kes ki sta kontenti. Nhos txora ku kes ki sta txora.”
— Rom. 12:15.

Kuzê ki Jizus faze

1. Odja **VÍDIU**, ô lé **Markus 6:30-34**. Dipôs pensa i responde kes pergunta li:

- Pamodi ki Jizus i se apóstlus krê ‘fikaba es sô’?
- Kuzê ki poi Jizus ta krê inxina kel monti di algen?

Kuzê ki nu ta prende ku Jizus?

2. Nu ka krê sô pàpia ku pesoas sobri notísias sábi, má tanbê nu krê djuda-s.



VÍDIU: Jizus xinti pena di kel monti di algen

Imita Jizus

3. **Obi ku atenson.** Dexa kel algen fla kuzê ki el ta pensa. Ka bu korta-l konbêrsu i nen ka bu iginora se sentimentus, preokupa-
sons ô kes kuza ki el ka ta konkorda ku bo. Óras ki bu ta obi ku
atenson, bu ta mostra kel algen ma bu ta inporta ku kuzê ki el
ta pensa.

4. **Pensa na kel algen ki mostra interesi.** Ku bazi na kel ki bu
pâpia ku el, pergunta bu kabêsa:

- a. ‘Pamodi ki el meste obi verdadi?’
- b. ‘Modi ki studa Bíblia ta djuda-l ten un vida más midjór gósi
i na futuru?’

5. **Pâpia di kes kuza ki pode djuda kel algen.** Lógu ki da, mos-
tra-l modi ki un studu di Bíblia pode responde se perguntas i
modi ki el pode djuda-l di txeu manera.

ODJA TANBÊ

Rom. 10:13, 14; Fil. 2:3, 4; 1 Ped. 3:8

10

Juan 3:1, 2



Sforsa pa djuda pesoas bira disiplus

Konsedju di Bíblia: “Nu staba disididu ka sô na pâpia ku nhos di kes notísia sábi di Deus, má tanbê na da nos vida pa pode djuda nhos.” — 1 Tes. 2:8.

Kuzê ki Jizus faze



VÍDIU: Jizus inxina Nikodemus

1. Odja **VÍDIU**, ô lé **Juan 3:1, 2**. Dipôs pensa i responde kes pergunta li:
 - a. Pamodi ki Nikodemus ba inkontra ku Jizus di noti? — Odja Juan 12:42, 43.
 - b. Kantu Jizus inkontra ku Nikodemus di noti, modi ki el mostra ma el staba disididu na faze disiplus?

Kuzê ki nu ta prende ku Jizus?

2. Nu ta mostra ma nu ta ama pesoas óras ki nu sta disididu na djuda-s bira disiplus.

Imita Jizus

3. **Studa na un óra i na un lugar ki é midjór pa bu studanti di Biblia.** El pode pidi pa studa na un dia i na un óra ki é midjór pa el. El pode xinti midjór si el studa na se lugar di trabadju, na se kaza ô na un lugar públiku. Faze tudu ki bu ta pode pa bu muda bu prugrama pa studa na óra i na lugar ki é midjór pa bu studanti.

4. **Studa sênpri.** Si bu ka ta konsigi ba faze kel studu, ka bu dismarka. Envê di kel-li, djobe kes opson li:

- a. Bu ta pode faze kel studu na un otu dia duráti kel simana?
- b. Bu ta pode faze kel studu pa tilifóni ô pa xamada ku vídiu?
- c. Bu ta pode pidi otu algen pa ba faze kel studu?

5. **Ora pa bu ten un bon atitudi.** Pidi Jeová pa djuda-u ka dizisti di bu studanti, mésmu ki el ka sta ta studa tudu simana, ô si el sta ku difikuldadi na aplika kuzê ki el sta ta prende. (Fil. 2:13) Bu studanti pode ten bons kualidadi, pur isu ora ta pidi ajuda pa bu konsentra na se kualidadis.

ODJA TANBÊ

Pro. 3:27; Atus 20:35; 2 Kor. 12:15

11

Mat. 6:25-27



Inxina di un manera sinplis

Konsedju di Bíblia: “Pâpia un kuza ki é fásil di intende”. — 1 Kor. 14:9.

Kuzê ki Jizus faze



VÍDIU: Jizus faze un ilustrason pa mostra modi ki nos Pai ta kuida di nos

1. Odja **VÍDIU**, ô lé **Mateus 6:25-27**. Dipôs pensa i responde kes pergunta li:

- Ki ilustrason Jizus uza pa mostra modi ki Jeová ta kuida di nos?
- Enbóra Jizus sabia txeu kuza sobri pasus, na ki kuza sinplis ki el konsentra? Pamodi ki kel-la foi un bon manera di inxina?

Kuzê ki nu ta prende ku Jizus?

2. Óras ki nu ta inxina di un manera sinplis, kes algen ta lenbra di kuzê ki nu inxina-s i nu ta toka ses korason.

Imita Jizus

3. **Ka bu pâpia txeu.** Envêş di fla tudu kel ki bu sabe sobri un asuntu, konsentra na kuzê ki kel publikason di studu ta fla. Dipôs di faze un pergunta, spera ku paxénxa pa bu studanti responde. Si el ka sabe respósta di kel pergunta ô el fla algun kuza ki ka sta di akordu ku Bíblia, faze-l otus pergunta pa djuda-l rasmusina sobri kel asuntu. Óras ki bu studanti dja intende kel pontu prinsipal, pasa pa otu asuntu.

4. **Djuda bu studanti liga kuzê ki el sta ta prende ku kuzê ki dja el prendeba antis.** Pur izénplu, antis di kumesa un lison sobri resureison, bu pode faze un rezumu ku bu studanti pa djuda-l lenbra di kuzê ki dja el prende na Bíblia sobri mortus.

5. **Uza ilustrasons ku kuidadu.** Antis di uza un ilustrason, pergunta bu kabésas:

- a. ‘Kel ilustrason li é simplis?’
- b. ‘Ta ba ser fásil pa nha studanti intende-l?’
- c. ‘El ta ba djuda nha studanti lenbra di kel pontu prinsipal envêş di lenbra sô di kel ilustrason?’

ODJA TANBÊ

Mat. 11:25; Juan 16:12; 1 Kor. 2:1

12

Mar. 10:17-22



Mostra koraji

Konsedju di Bíblia: ‘Óliu ku insénsu ta poi korason kontenti, sima un amizadi dósi ki ta nase pamodi un konsedju sinseru.’

— Pro. 27:9.

Kuzê ki Jizus faze

1. Odja **VÍDIU**, ô lé **Markus 10:17-22**. Dipôs pensa i responde kes pergunta li:

- Ki bons kualidadi talvê Jizus konsigi odja na kel jóven governanti?
- Pamodi ki Jizus mesteba di amor i koraji pa daba kel ómi konsedju?

Kuzê ki nu ta prende ku Jizus?

2. Óras ki nu meste splika nos studanti kuzê ki el debe faze pa el pode kontinua ta bira más amigu di Jeová, nu debe faze-l ku amor, má tanbê di manera klaru.



VÍDIU: Jizus da un konsedju pa un jóven ki éra un governanti riku

Imita Jizus

3. Djuda bu studanti poi i alkansa métas.

- a. Uza kel párti “Sprimenta faze kel-li” di kada lison di
Vive filis pa tudu ténpu!
- b. Djuda bu studanti intende kuzê ki el meste faze pa el
alkansa métas ki ta leba poku ténpu i métas ki ta leba
más ténpu.
- c. Ilojia bu studanti sénpri pa prugrésu ki dja el faze.

4. Djobe kuzê ki sta ta inpidi bu studanti di faze prugrésu i djuda-l vense kes probléma.

- a. Pergunta bu kabésa:
 - ‘Si nha studanti ka sta ta prugridi pa batiza, kuzê ki
sta ta inpidi-l?’
 - ‘Kuzê ki N pode faze pa N djuda-l?’
- b. Ora ta pidi koraji pa bu pâpia ku bu studanti di manera
klaru i ku amor sobri kuzê ki el meste faze.

5. Para studu si kel studanti ka sta faze prugrésu.

- a. Pa bu sabe si bu studanti di Bíblia sta ta faze prugrésu,
pergunta bu kabésa:
 - ‘Nha studanti sta ta faze sima el sta ta prende?’
 - ‘El sta sisti runions i el sta pâpia ku otus sobri verdadis
di Bíblia?’
 - ‘Dipôs di algun ténpu ta studa, dja el krê bira un
Tistimunha di Jeová?’
- b. Si un studanti di Bíblia ka krê faze prugrésu:
 - Pidi-l pa el pensa sobri kuzê ki pode sta ta inpidi-l di
faze prugrésu.
 - Splika-l ku jetu pamodi ki bu sta ta para se studu.
 - Dexa-l sabe kuzê ki el meste faze si dipôs el krê studa
otu bês.

ODJA TANBÊ

Sal. 141:5; Pro. 25:12; 27:6; 1 Kor. 9:26; Kol. 4:5, 6

Verdadis di Bíblia ki nu gusta di inxina

Jizus fla ma kes algen sinseru ta ben rekonhese verdadi óras ki es obi-l. (Juan 10:4, 27) Nton, sênpri ki nu pâpia ku pesoas, nu krê mostra-s kes verdadi sinplis di Bíblia. Pa bu kumesa ta pâpia sobri un verdadi sprimenta faze perguntas sima: “Bu sabia ma... ?” ô “Dja bu obi ta papiadu di... ?” Dipôs uza un ô más testu di Bíblia pa splika kel verdadi. Pâpia sô un verdadi sinplis di Bíblia pode txiga pa planta un simenti na korason di un algen, i Deus pode poi kel simenti ta kria! — 1 Kor. 3:6, 7.



FUTURU

- 1.** Kes kuza ki nu sta odja ta kontise i modi ki pesoas sta konporta, ta mostra ma ka ta dura kuzas ta ben muda. — Mat. 24:3, 7, 8; Luk. 21:10, 11; 2 Tim. 3:1-5.
- 2.** Têra nunka ka ta ben ser destruídu. — Sal. 104:5; Ecl. 1:4.
- 3.** Ka ta ben ten poluison i téra ta ben ser un paraízu. — Isa. 35:1, 2; Apo. 11:18.
- 4.** Tudú algen ta ben ten saúdi perfeitu. — Isa. 33:24; 35:5, 6.
- 5.** Bu pode vive na téra pa tudú ténpu. — Sal. 37:29; Mat. 5:5.

FAMÍLIA

- 6.** Maridu debe “ama se mudjer sima el ta ama se kabésa”. — Efé. 5:33; Kol. 3:19.
- 7.** Mudjer debe ten txeu ruspetu pa se maridu. — Efé. 5:33; Kol. 3:18.
- 8.** Maridu ku mudjer debe ser lial pa kunpanheru. — Mal. 2:16; Mat. 19:4-6, 9; Eb. 13:4.
- 9.** Fidjus ki ta ruspeta i ta obi ku ses pai i ku ses mai ta ten bons rezultadu. — Pro. 1:8, 9; Efé. 6:1-3.

DEUS

- 10.** Deus ten un nómi. — Sal. 83:18; Jer. 10:10.
- 11.** Deus ta pâpia ku nos. — 2 Tim. 3:16, 17; 2 Ped. 1:20, 21.
- 12.** Deus é justu i el ta trata tudú algen igual. — Deut. 10:17; Atus 10:34, 35.
- 13.** Deus krê djuda-nu. — Sal. 46:1; 145:18, 19.



ORASON

- 14.** Deus krê pa nu ora pa el.
— Sal. 62:8; 65:2; 1 Ped. 5:7.
- 15.** Biblia ta inxina-nu modi ki nu debe ora. — Mat. 6:7-13; Luk. 11:1-4.
- 16.** Nu debe ora manenti.
— Mat. 7:7, 8; 1 Tes. 5:17.



JIZUS

- 17.** Jizus foi un grandi instrutor i se konsedjus ta sirbi ti oji. — Mat. 6:14, 15, 34; 7:12.
- 18.** Jizus dja flaba sobri kes kuza ki nu sta odja ta kontise oji. — Mat. 24:3, 7, 8, 14; Luk. 21:10, 11.
- 19.** Jizus é fidju di Deus. — Mat. 16:16; Juan 3:16; 1 Juan 4:15.
- 20.** Jizus é ka Deus Tudu-Poderozu. — Juan 14:28; 1 Kor. 11:3.



REINU DI DEUS

- 21.** Reinu di Deus é un govêrnu ki sta na séu. — Dan. 2:44; 7:13, 14; Mat. 6:9, 10; Apo. 11:15.
- 22.** Reinu di Deus ta ben fika na lugar di tudu kes govêrnu di ômi. — Sal. 2:7-9; Dan. 2:44.
- 23.** Reinu di Deus é úniku soluson pa nos problémas. — Sal. 37:10, 11; 46:9; Isa. 65:21-23.



SUFRIMENTU

- 24.** É ka Deus ki ta pô-nu ta sufri.
— Deut. 32:4; Tia. 1:13.
- 25.** É satanás ki sta ta governa mundu. — Luk. 4:5, 6; 1 Juan 5:19.
- 26.** Deus ta inporta ku bu sufrimentu. — Sal. 34:17-19; Isa. 41:10, 13.
- 27.** Ka ta dura Deus ta ben kaba ku sufrimentu. — Isa. 65:17; Apo. 21:3, 4.



MÓRTI

- 28.** Kes algen ki sta mortu ka sabe di más nada i nen es ka sta sufri. — Ecl. 9:5; Juan 11:11-14.
- 29.** Kes algen ki sta mortu ka ta pode djuda-nu nen prujudika-nu. — Sal. 146:4; Ecl. 9:6, 10.
- 30.** Kes algen ki nu ta ama ki dja móre ta ben vive otu bês. — Jó 14:13-15; Juan 5:28, 29; Atus 24:15.
- 31.** “Ka ta ben ten más mórti”. — Apo. 21:3, 4; Isa. 25:8.



RELIJION

- 32.** É ka tudu relijion ki ta agrada Deus. — Jer. 7:11; Mat. 7:13, 14, 21-23.
- 33.** Deus ta ôdia finjimentu. — Isa. 29:13; Miq. 3:11; Mar. 7:6-8.
- 34.** Amor di verdadi ta identifika relijion verdaderu. — Miq. 4:3; Juan 13:34, 35.

Bu debe para kel konbêrsu?

Óras ki un algen ta faze-nu un pergunta ku sinseridadi ô el ka ta konkorda ku nos, nu ta fika kontenti di kontinua ta pâpia ku el. Nu krê pâpia ku kes algen ki pode ten un “bon atitudi pa gâna vida pa tudu ténpu”. — Atus 13:48.

Má, i si un algen sta xatiadu, krê diskuti ô el ka krê pâpia na kel óra? Ku kalma i ku jetu bu pode para kel konbêrsu. (Pro. 17:14) Tenta mostra ruspetu i bondadi, asi pa kel algen sta dispostu na pâpia ku nos na un otu día. — 1 Ped. 2:12.



Modi ki nu pode uza *Vive filís pa tudu témpu!* pa faze studus di Bíblia

Irmons faze txeu orason i es djobe ku kuida-
dadu ki informasons ki es ta poba na livru
Vive filís pa tudu témpu!. Pa bu uza es publi-
kason midjór, sigi kes instruson ki sta dibaxu
óras ki bu ta faze un studu di Bíblia.

Antis di studu

1. Pripara dretu. Óras ki bu sta ta pripara, pensa na kuzê ki bu studanti meste, pensa na se situa-
son i na kuzê ki el ta kridita na el. Pensa na kes
kuza ki pode ser difísil pa el intende ô pa el apli-
ka. Djobe modi ki kes informason ki sta na párti
“Djobe más” pode djuda bu studanti, i sta prontu
pa uza-s duráti studu, si meste.

Duráti studu

2. Kumesa i tirmina studu ku orason si bu studanti
ta konkorda.
3. Toma kuida-
dadu pa bu ka pâpia dimás. Konsentra
na kes informason di livru i dexe bu studanti
pâpia.
4. Óras ki bu ta kumesa un párti di livru, lé kes in-
formason ki sta distakadu na komésu di kel párti,
i pâpia sobri téma di alguns di kes lison.
5. Óras ki bu ta tirmina un párti, uza perguntas di
rezumu di kel párti, pa djuda bu studanti lenbra
di kes verdadi ki el prende.





6. Óras ki bu ta studa kada lison ku bu studanti:

- a. Lé kes parágrafo.
- b. Lé tudu kes testu di Bíblia ki sta skrebedu “Lé”.
- c. Lé otus testu di Bíblia si meste.
- d. Mostra tudu kes vídiu ki sta skrebedu “Odja” (si ta da).
- e. Faze studanti tudu kes pergunta.
- f. Pidi bu studanti pa odja kes imajen na kel párti “Sabe más” i pidi-l pa el pâpia sobri es.
- g. Uza kuadru “Sprimenta faze kel-li” pa djuda bu studanti alkansa se méta. Bu pode inko-
raja-l pa el poi kel méta ki sta la, pa el skrebe
otu méta ô pa el uza tudu dôs.
- h. Pergunta bu studanti si kantu el staba ta pri-
para se studu, si el odja algun artigu ô vídiu
di párti “Djobe más” ki el gosta más txeu.
- i. Tenta studa un lison interu na kada studu.

Dipôs di studu

7. Kontinua ta pensa na bu studanti. Faze orason ta
pidi Jeová pa el abênsua prugrésu ki bu studanti
sta ta faze i pa el da-u sabedoria pa bu kontinua
ta djuda-l.